

Prome cu solo a sali

Autoridadnan hudicial a drenta cas di Minister Glenbert Croes

AYERA mainta prome cu e prome rayo di solo a presenta den shelo, autoridadnan hudicial, cu sosten di algun otro departamento, a forma un tipo di baricada rond di un cas na Bubali, cu despues a bin resulta cu ta residencia di Minister demisionario Glenbert Croes.

Un accion cu a ser ehecuta den un silencio casi perfecto pero cu mesora a hala atencion di ciudadanonan den bisindario pero segun e minuutnan a pasa, a bin resulta cu e “inval” aki tabata den cas di Minister demisionario Glenbert Croes. Un accion cu mas laat Ministerio Publico a confirma cu tabata parti di e investigacion profundo cu a bin ta tumando luga den e caso cu haya e apodo di “caso Portulaca” cu ta relaciona cu asunto di otorgamento di permiso di estadia y di labor y cual caso ya tin algun luna den investigacion.

Den oranan trempan no por a haya mucho informacion oficial riba e accion aki di Landsrecherche y RST pero prome cu esaki a drenta, ya tur hende tabata na altura cu ta trata aki di Minister demisionario Glenbert Croes.

Mas laat a drenta e informacion cu autoridadnan di Landsrecherche y RST en cooperacion cu Ministerio Publico, a dicidi di bay over na detencion di Glenbert y mesora a dicidi di transporta su persona pa e seccion di RST cu awor ta centralisa den Marinierskazerne na Savaneta caminda a sigui cu interrogacion di e mandatario. Mientras tanto Ministerio Publico a emiti un comunicado di prensa

riba loke a sosode den oranan trempan di mainta y a sigura cu e caso aki no tin nada di haber cu e proceso electoral cu e isla ta pasando aden na ultimo tempo.

Fiscal a confirma cu a informa Minister Glenbert Croes cuy oficialmente e ta ser mira como “sospechoso oficial” den e caso penal Portulaca loke a hinca e mandatario den un situacion sumamente delicado cu eleccion den porta.

Detencion di Glenbert Croes a cay manera un bom den seno di partido MEP a surgi mesora panico ya cu loke tabata un campaña politico cu unico preocupacion e caida di Gabinete Wever Croes II cu awor a bin haya un golpi fulminante sin spera. E partido di Evelyn Wever Croes a bin haya un contratiempo di marca mayor y cu sin duda lo laga su daño irreparable atras net den e periodo di eleccion y tur esaki mientras cu lider di partido mes tabata den exterior y mesora el a dicidi di regresa bek y den oranan di merdia el a yega pa bay mira con su partido lo atende e asunto aki.

Loke a sorprende hopi tambe ta e hecho cu autoridadnan a dicidi di no transporta e minister directamente pa departamento di Landsrecherche pero a informa e mandatario cu oficialmente e ta sospechoso oficial den e investigacion di e caso Portulaca y a hiba su persona pa Marinierskazerne pa wordo interoga, loke a sorprende hopi hende.

A informa e mandatario cu e lo keda deteni por lo pronto te ora cu autoridadnan dicidi cu e por bolbe wordo laga den libertad.

Cumpliendo cu ley existente

Minister Glenbert Croes a entrega retiro como minister

E sorpresa di detencion di Minister demisionario Glenbert Croes den oranan di merdia a wordo sigui pa otro noticia impactante na momento cu den oranan di merdia, a bira oficial cu Glenbert Croes a dicidi di retira como minister den e Gabinete demisionario di Evelyn Wever Croes II. Cumpliendo cu ley existente no a keda e yiu di Betico Croes den feliz memoria cu ta obliga un Minister di entrega su retira asina cu oficialmente e bira sospechoso den un caso penal y esaki ta e proceso cu a tuma luga.

Algun ora despues for di despacho di Prome Minister demisionario Evelyn Wever Croes confirmando cu e carta di retiro di colega Glenbert, a wordo ricibi y cu esaki a wordo acepta y oficialmente Glenbert ya no ta minister mas. Un golpi fuerte pa partido di MEP cu den persona di Glenbert, la logra di sigura un di e shete asientonan cu e partido a ricibi den eleccion di 2021 caminda el a logra di ricibi un total di 1919 voto personal cu a situa su persona den e prome 10 politiconan cu mas voto a logra den e ultimo proceso electoral.

E decision di e mandatario practicamente un aceptacion cu el na wordo confronta cu pruebanan contundente cu a ser acumula te cu awor den su contra y su participacion den e proximo eleccion riba lista di partido

MEP, a bira totalmente imposibel.

Algo prome cu 3’or di atardi lider di partido MEP a regresa bek for di exterior ya cu tur cos sa bruha sigur pa loke ta e campaña electoral di e partido geel y na su yegada a muestra cu detencion di su primo, ta un sla hopi duro pa e partido den e campaña electoral.

Na 2021 Glenbert tabata number 4 riba e lista di MEP y a bira e di tres vote getter mas grandi di e partido tras di Evelyn Wever Croes y Dangui Oduber pero lo bira un problema pa e partido cubri un buraco di e tamaño aki net algun siman tuma luga.

Segun e lider di MEP e decision pa baha como Minister mesora lo tabata suficiente pa Glenbert entrega su retiro pero realidad ta cu tin un ley cu ta obliga tur minister cu bira sospechoso den un investigacion penal, tin cu entrega su retiro di inmediato.

Hopi ta esunnan cu no a wordo sorprende cu detencion di Glenbert Croes ya cu ta for di algun tempo caba tin diferente desaroyonan cuestionabel cu a bin ta tumando luga rond di e mandatario y caminda principalmente na e departamento di DIMAS a surgi un serie di situacionnan cu tabata muestra cu no ta desaroyonan corecto.